

Aktuelnosti:

1. Promoviranje povezivanja francuskih i bh. općina
2. Održana radionica „Kako medijski prezentirati općinu“
3. Radionica o razvoju turizma na lokalnom nivou
4. Održana regionalna konferencija „Lokalno zaduživanje i upravljanje općinskim deponijama“
5. Izrađen prvi katakog ugovorenih projekata IPA Programa prekogranične saradnje
6. Studijska posjeta R. Irskoj
7. Sarajevske općine spremaju tužbu u vezi Zakona o koncesijama
8. Održana Javna rasprava o besplatnoj pravnoj pomoći
9. Intervju s načelnikom Općine Maglaj, Mehmedom Mustabašićem
10. NAJAVA radionice o Programu Zajednice „Evropa za građane“
11. Dan otvorenih dana u Bihaću
12. NAJAVA obilježavanja dana općina

Poštovani članovi i čitaoci,

Kao i do sada, obavještavamo Vas o unutrašnjoj i vanjskoj komunikaciji i razmjeni najboljih iskustava i praksi kao i o različitim obukama koje mogu doprinijeti kadrovskom jačanju općinskih službenika.

Putem ovog biltena se možete informirati i o drugim dešavanjima u

PROMOVIRANJE POVEZIVANJA FRANCUSKIH I BOSANSKOHERCEGOVAČKIH OPĆINA



SARAJEVO, 24. novembar/studeni – U srijedu 23.11. 2011. godine, u zgradi Privredne komore Kantona Sarajevo, u organizaciji Francuske Ambasade u Bosni i Hercegovini održan je 8. Okrugli sto decentralizovane saradnje pod nazivom „Povezivanje Francuska/Bosna i Hercegovna, kako dalje?“

Okruglom stolu prisustvovali su načelnici i gradonačelnici iz Bosne i Hercegovine i Francuske koji imaju razvijenu saradnju, predstavnici Saveza općina i gradova FBIH, predstavnici Saveza opština i gradova RS, te gosti iz Francuske.

Nj.E. Ambasador Roland Gilles je otvorio 8. Okrugli sto i naglasio da je jedan od prioriteta Francuske daljnja podrška Bosni i Hercegovini i njenim evropskim integracijama. U ovom momentu oko 40 općina i gradova Bosne i Hercegovine je uključeno u decentralizovanu saradnju sa općinama i gradovima iz Francuske.

Predstavnici općina Goražde, Gračanica, Tuzla, Gradačac, Busovača i Konjic su prezentirali projekte i vidove saradnje sa svojim partnerskim općinama i gradovima u Francuskoj, iskazujući zadovoljstvo međusobnom saradnjom, te dali sugestije kako i na koji način da se saradnja u budućnosti nastavi, ojača i proširi i na druge općine u BiH.

Nakon završetka 8. Okruglog stola, Nj.E. Ambasador Gilles je prisutne ugostio u svojoj rezidenciji na prikladnoj večeri.

ODRŽANA RADIONICA „KAKO MEDIJSKI PREZENTIRATI OPĆINU/GRAD“



GORAŽDE, 21.-22. novembar/studeni – U sklopu projekta „Moje dvorište“ kojeg realizira Savez općina i gradova Federacije BiH, održana je dvodnevna radionica na temu „Kako medijski prezentirati općinu/grad“. Na radionici službenici za odnose sa javnošću općina u Federaciji BiH imali su priliku da se kroz interaktivne prezentacije više informišu o tome kako

proteklim periodu kao što su konferencije, seminari, okrugli stolovi a koji mogu doprinijeti unapređenju sistema lokalne uprave.

Ukoliko želite da se prijavite za primanje ovog biltena možete to učiniti tako što ćete poslati e-mail na sljedeću adresu: dino@sogfbih.ba

Molimo vas da ovaj elektronski bilten proslijedite svim zainteresiranim u vašoj i susjednim općinama.

Ukoliko želite da objavite neke od vaših novosti, iskoristite elektronski bilten Saveza, koji je brz, efikasan i jeftin način komuniciranja sa javnošću.

Sa zadovoljstvom očekujemo vaše komentare, sugestije i primjedbe.

Kontaktirajte nas

Telefoni:

033/ 216 502, 033/ 552 812

Fax: 033/552 810, 033/ 552 811

<http://www.sogfbih.ba>

<http://www.partnerstvogradova.ba/>

e-mail: dino@sogfbih.ba

ZA PRAVNO SAVJETOVALIŠTE:

Selma Fišek, viši saradnik za pravna pitanja
fax: + 387 33 552 810
selma@sogfbih.ba

promovisati stavove i interese lokalnih zajednica, njihove dobre primjere iz prakse, kako povećati znanje građana o evropskim standardima i vrijednostima, te biti podrška razvoju lokalnih zajednica. Prezentaciju su vodili: novinarka „BH novinari“, gospođa Borka Rudić, direktor vijesti TV Hayat, g-din Kenan Čerimagić i saradnik za lokalnu samoupravu Saveza općina i gradova FBiH, g-din Edin Demirović. Ujedno, u toku radionice, izvršena je i prezentacija rezultata projekta „Moje dvorište“.



RADIONICA O RAZVOJU TURIZMA NA LOKALNOM NIVOU



GRUDE, 21. novembar/studen – Radionica pod nazivom "Planiranje i upravljanje razvojem održivog turizma na lokalnoj i regionalnoj razini" održava se od 21. do 23. novembra/studenoga u motelu "Kiwi", u Grudama. Radionica je drugi korak operacionalizacije provedbe treninga vezanog za Razvoj održivog turizma u lokalnoj zajednici, a sukladno s

projektnom aktivnosti EU projekta "Baština u turističkoj ponudi Hercegovine: Putovima baštine na Trebižatu", kojeg provodi REDAH u partnerstvu s općinama Grude, Ljubuški, Čapljina i Udrugom Hercegovački STAP.

Projekt financira Europska unija u okviru potpore gospodarskog razvitka Bosne i Hercegovine. Opći je cilj projekta doprinijeti gospodarskom razvitku Hercegovine kao turističke regije kroz integraciju kulturno-povijesne i prirodne baštine u turističku ponudu, dok su specifični ciljevi projekta poboljšati sadržaj turističke ponude u Hercegovini i povećati broj turista koji posjećuju Hercegovinu, te povećati broj noćenja, odnosno produžiti njihov boravak u Hercegovini.

Radionica je namijenjena predstavnicima institucija javnog, privatnog i nevladinog sektora Gruda, Ljubuškog, Čapljine i Udruge Hercegovački STAP.

ZA FINANSIJSKO SAVJETOVALIŠTE:

Dženita Kovačević, viši saradnik za
finansijska pitanja
fax: + 387 33 552 810
dzenita@sogfbih.ba

NAŠ CILJ je informirati vas o
seminarima, treninzima,
konferencijama i drugim
aktivnostima, koji unapređuju lokalnu
upravu i kadrovsko jačanje zaposlenih
u vašim općinama.

KORISNI LINKOVI ZA PREDPRISTUPNE FONDOVE:

<http://www.southeast-europe.net/en/>

<http://www.adriaticipacbc.org/>

<http://www.interregadriatico.it/index1.html>

<http://www.europa.ba/>

<http://www.cbib-eu.org/en/welcome/index.html>

<http://www.cbc.bih-mne.org/>

<http://www.srb-bih.org/>

<http://www.cbc-cro-bih.net/>

<http://www.programmed.eu/>

<http://www.tacso.org/>

<http://www.euroinfocentar.ba/>

<http://www.balkanfund.org/>

<http://eurelmed.com/>

http://eacea.ec.europa.eu/index_en.php

ODRŽANA REGIONALNA KONFERENCIJA „LOKALNO ZADUŽIVANJE I UPRAVLJANJE OPĆINSKIM DEPONIJAMA“



U organizaciji NALAS-a (Mreže lokalnih vlasti Jugoistočne Evrope) u turskom gradu Bursi je 16. novembra/studenog održana regionalna konferencija na temu „Lokalno zaduživanje i upravljanje općinskim deponijama“.

Konferenciji je prisustvovalo oko 70 predstavnika asocijacija i lokalnih vlasti iz 12 zemalja Jugoistočne Evrope, kao i eksperti iz oblasti lokalnih finansija i upravljanja čvrstim otpadom i predstavnici međunarodnih organizacija, dok su glavni sponzori konferencije bili Njemačko društvo za tehničku saradnju (GIZ) – kroz otvoreni regionalni fond za modernizaciju općinskih servisa, Asocijacija regija Rumunije (ACoR), Asocijacija kosovskih općina (AKM), uz pomoć Unije općina turske regije Marmara i Općine Yildirim.

Na konferenciji, učesnici su imali priliku upoznati se sa rezultatima studija "Priručnik za zaduživanje jedinica lokalne samouprave" i „Priručnika za učinkovito upravljanje otpadom“. Razmatrane su inicijative u domeni fiskalne decentralizacije i upravljanja krutim otpadom u regiji Jugoistočne Evrope, te je izvršena procjena mogućih sinergija između njih.

Studija "Priručnik za zaduživanje jedinica lokalne samouprave" dio je aktivnosti NALAS-ove Radne grupe za fiskalnu decentralizaciju. U ovom priručniku projektni tim je analizirao najnovije trendove u vezi zaduživanja lokalnih samouprava u zemljama Jugoistočne Evrope.

Priručnik za zaduživanje jedinica lokalne samouprave sadrži osnovne principe zaduživanja jedinica lokalne samouprave, načine iznalaženja odgovarajućih instrumenata zaduživanja, sve o ocjenama kreditne sposobnosti jedinica lokalne samouprave i sl.

Model informacijskog sistema za lokalno upravljanje komunalnim otpadom (SWIS) s Priručnikom za učinkovito upravljanje otpadom, bio je drugi završeni projekat koji ponuđen lokalnoj samoupravi regije.

Obje ove oblasti predstavljaju ključne faktore u pripremi za ulazak u Evropsku uniju. Prihvatajući opće prakse i sektorske politike EU-a i uvodeći ih u nacionalno zakonodavstvo, ubrzo će se proces pristupa u EU za zemlje iz regije Jugoistočne Evrope.

Studija "Priručnik za zaduživanje jedinica lokalne samouprave" i „Priručnik za



učinkovito upravljanje otpadom“ izrađeni su uz pomoć ACoR, AKM i GIZ-a. Drugi dan susreta iskorišten je za održavanje sastanka Odbora oficira za vezu (CLO), te sastanka Radne grupe za fiskalnu decentralizaciju. Odbora oficira za vezu čine direktori/sekretari nacionalnih asocijacija iz država članica NALAS-a. Na tom sastanku


raspravljano je o novom rotacijskom sistemu izbora predsjednika i potpredsjednika NALAS-a, a u pridruženo članstvo primljen je Savez asocijacija lokalne samouprave turski govorećih krajeva i regija (TDBB).

Glavna tema sastanka Radne grupe za fiskalnu decentralizaciju bila je Komparativna analiza međuadministrativnih fiskalnih odnosa u Jugoistočnoj Evropi, te implikacije rezultata analize za pojedine asocijacije lokanih vlasti, kao i za NALAS u cjelosti. Predstavljeni su ključni indikatori ove analize, te preliminarne zaključci na osnovu podataka o finansijama jedinica lokalne samouprave u zemljama članicama NALAS-a. Pored ovoga, razmatran je i koncept plana za diseminaciju rezultata ove analize. Sastanku su se priključili i predstavnici GIZ - Otvorenog regionalnog fonda za modernizaciju općinskih servisa, koji su članove radne grupe upoznali sa procedurama apliciranja kod ovog fonda.

NALAS predstavlja mrežu asocijacija lokalnih vlasti Jugoistočne Evrope, koja je osnovana 2001. godine, nakon Prvog foruma gradova i regija jugoistočne Evrope (Skoplje, novembar 2000. godine), uz podršku Kongresa lokalnih i regionalnih vlasti Vijeća Evrope, Pakta stabilnosti Jugoistočne Evrope i Vijeća Evrope. NALAS danas okuplja 15 asocijacija iz zemalja Jugoistočne Evrope, koje predstavljaju više od 4000 jedinica lokalne samouprave, i oko 80 miliona građana ove regije. Sekretarijat NALASA se nalazi u Skoplju i odgovoran je za koordinaciju i implementaciju aktivnosti.

Savez općina i gradova Federacije BiH je jedan od osnivača NALAS-a, te aktivan učesnik u svim aktivnostima putem svojih predstavnika.

IZRAĐEN PRVI KATALOG UGOVORENIH PROJEKATA IPA PROGRAMA PREKOGRANIČNE SARADNJE



Projekat jačanja kapaciteta institucija za prekograničnu saradnju (Cross Border Institution Building – CBIB) uz saradnju i podršku Operativnih struktura, Zajedničkog tehničkog sekretarijata/antena i EU Delegacije izradio je katalog svih prekograničnih projekata ugovorenih nakon prvog poziva za osam IPA Programa Prekogranične saradnje između zemalja zapadnog Balkana. Katalog je dostupan u elektronskoj formi na sljedećem linku: [IPA CBC](#)

U SKLOPU PROJEKTA „SISTEM OBUKE ZA JLS U BIH“ ORGANIZOVANA STUDIJSKA POSJETA REPUBLICI IRSKOJ



U periodu od 07. do 13. novembra/studenog 2011. godine, u sklopu projekta „Sistem obuke za jedinice lokalne samouprave u Bosni i Hercegovini“, organizovana je studijska posjeta Republici Irskoj.

Učesnici studijske posjete bili su predstavnici partnerskih organizacija i institucija sistema obuke u Bosni i Hercegovini, i to: Ministarstvo pravde BiH, Federalno ministarstvo pravde, Savez općina i gradova Federacije BiH, Agencija za državnu službu Federacije BiH, Komisija za obuku Republike Srpske (Predstavnic Ministarstva uprave i lokalne samouprave Republike Srpske i Agencije za državnu upravu Republike Srpske), Kancelarija za obuku Republike Srpske (Ministarstvo uprave i lokalne samouprave Republike Srpske), Savez opština i gradova Republike Srpske, Jedinice lokalne samouprave iz Federacije BiH i Republike Srpske, Sida – Švedska organizacija za međunarodnu razvojnu saradnju, koja je primarni donator Projekta „Sistem obuke za jedinice lokalne samouprave“, te predstavnici projektnog tima UNDP-a.

U okviru ove studijske posjete učesnici su se upoznali sa sistemom obuke za jedinice lokalne samouprave u Republici Irskoj, uključujući pravni i operativni okvir, finansijske i operativne modalitete, definiranje prioriternih programa obuke, pristupe, alate i prakse za izvođenje obuke, kao i osiguravanje kvalitete i akreditaciju.

Domaćin posjete je bio irski Institut za javnu upravu (IPA) koji je zadužen za sveukupnu pripremu i organizaciju obuke u Republici Irskoj.



SARAJEVSKE OPĆINE SPREMAJU TUŽBU: ZAKON O KONCESIJAMA DOČEKAN NA NOŽ



SARAJEVO, 17. novembar/studeni – (eKapija) Zakon o koncesijama Kantona Sarajevo, koji je pokrenuo brojne diskusije u skupštinskim klupama, stupio je snagu, a lokalne zajednice već pripremaju tužbu Ustavnom sudu za njegovo poništenje.

Sarajevske općine od samog početka bune se protiv odredbe zakona kojom će se 60 posto prihoda od koncesija sliti u kantonalnu kasu, dok će samo 40 posto do naknada pripasti općinama. I poslanici u Skupštini KS imali su brojne primjedbe na predloženi nacrt, od malih sankcija za prekršioce do nepostojanja federalnog zakona iz te oblasti, ali su na kraju popustili i zakon je prošao glasanje.

Načelnik općine Stari Grad Ibrahim Hadžibajrić ostaje pri svom stavu - na zakon će odgovoriti tužbom Ustavnom sudu FBiH, koji će ispitati ustavnost usvojenog zakona. Pri tome, tražit će podršku načelnika ostalih osam općina u Kantonu Sarajevu, a ukoliko ona bude uskraćena, tužbu će podnijeti sam.

"Općina Stari Grad će pripremiti tužbu i proslijediti je drugim općinama u Kantonu Sarajevu da daju svoju saglasnost. Ukoliko i ne budu dali saglasnost, Općina Stari Grad podnijet će tužbu Ustavnom sudu FBiH", kazao je Hadžibajrić za eKapiju.

Općine su upozorile Vladu Kantona Sarajevo da sačeka sa donošenjem kantonalnog zakona, s obzirom da na federalnom nivou još nije usvojen zakon o koncesijama koji bi trebao predstavljati zakonski okvir za koncesije. Prijedlog federalnog zakona pak predviđa da 60 posto sredstava ide općinama, a 40 posto Federaciji. No, Vlada KS, koja je bila predlagač, oglušila se na ove primjedbe, tvrdeći da novi zakon bolji od prethodnog.

Načelnik općine Hadžići Hamdo Ejubović tvrdi da Kanton na ovaj način uzurpira pravo lokalne zajednice da raspolaže svojim prirodnim bogatstvima. On naglašava da općine nisu "okupirane teritorije", te da lokalne zajednice same imaju pravo da odlučuju o uslovima života svojih građana.

"Nećemo dopustiti Kantonu niti jednu koncesiju nad javnim dobrom u Hadžićima. Podsjećam da su općinska vijeća ta koja daju saglasnost za dodjelu koncesije, svaki zahtjev od kantonalne vlasti za otvaranje postupka dodjele kod nas će naići

na odbijanje", odlučan je Ejubović.

On ističe da sve ostale odredbe zakona mogu proći, ali da distribucija novca od koncesija treba da bude poštena, u omjeru 70 općine, 30 posto Kanton. Ovako, općine trpe štetu, a nemaju dogovarajuću naknadu za eksploataciju prirodnih resursa kao što su šume, kamen, rude, zemljište.

"Ugovori koje oni potpisuje su vrlo štetni za lokalne zajednice, imovina se prodaje u bescjenje. Tih pet feninga po metru kubnom kamena koliko plaćaju koncesionari, mi bi dali toliko novca samo da nam se ne kopa kamen, minira područje, ne dižu prašina, ne upropaštavaju putevi", tvrdi Ejubović.

Isplata kredita od naknada


S druge strane, premijer Kantona Sarajevo Fikret Musić priznao je da se Kanton dosta zadužio, te da preko naknada od koncesija namjeravaju plaćati rate kredite. Poznato je da se kantonalna Vlada zadužila kod Evropske banke za obnovu i razvoj u iznosu od 16,5 miliona eura za izgradnju gradskih saobraćajnica, te 23,6 miliona eura kod Svjetske banke za obnovu postrojenja za prečišćavanje otpadnih voda Butila.

Ejubović naglašava da je pohvalno što se ulaže u infrastrukturu Kantona Sarajeva, ali naglašava da od izgradnje zapadnog prilaza prije nekoliko godina, Kanton Sarajevo nije imao nikakvih značajnih ulaganja u Hadžiće.

ODRŽANA JAVNA RASPRAVA O NACRTU ZAKONA O BESPLATNOJ PRAVNOJ POMOĆI

SARAJEVO, 16. novembar/studeni – Ministarstvo pravde BiH organizovalo je danas javnu raspravu o Nacrtu zakona o besplatnoj pravnoj pomoći. Riječ je o zakonu kojim se definišu osnovni principi besplatne pravne pomoći i koji predviđa da lica slabijeg imovinskog stanja imaju jednako pravo na pomoć države, entiteta i drugih nadležnih organa, u sudskim i drugim sporovima. Ministar pravde BiH Bariša Čolak izrazio je očekivanja da će nacrt zakona, koji predviđa pravnu pomoć najsiromašnijim građanima, nakon trećeg pokušaja biti usvojen u Parlamentarnoj skupštini BiH.

Zakon kojim se reguliše oblast besplatne pravne pomoći do sada je donesen na nivou Republike Srpske, Brčko Distrikta BiH i četiri kantona u Federaciji, dok ova oblast na nivou države i Federacije BiH nije regulisana. Ministar Čolak je istakao da se zakonom o besplatnoj pravnoj pomoći



na državnom nivou uređuju minimalni standardi kako bi građani bili ravnopravni i kako bi se spriječila diskriminacija koja proizilazi iz manjkavosti postojećeg zakonskog okvira. "Advokati bi bili ti koji bi pružali pomoć kada je u pitanju zastupanje, kao i do sada. Međutim, druga vrsta besplatne pravne pomoći pred organima na nivou BiH bila bi u Ministarstvu pravde BiH", kazao je ministar Čolak. Kreiranje funkcionalnog sistema u pružanju besplatne pravne pomoći u krivičnim, građanskim i upravnim postupcima na svim nivoima u Bosni i Hercegovini jedan je od strateških ciljeva Strategije za reformu sektora pravde u BiH. Kao članica Vijeća

Evrope i kao potencijalni kandidat za pristup Evropskoj uniji Bosna i Hercegovina je dužna osigurati jednak tretman svih građana u ovoj oblasti.

INTERVJU: NAČELNIK OPĆINE MAGLAJ MEHMED MUSTABAŠIĆ

Razgovarala: Lejla KURTOVIĆ



SARAJEVO, 15. novembar/studeni – (ONASA) Načelnik Općine Maglaj Mehmed Mustabašić u intervjuu za Agenciju ONASA govori, između ostalog, o trenutnoj ekonomskoj situaciji na području ove općine, nosiocima privrednog razvoja, zatim šta Općina čini kako bi privukla inostrane ulagače, općinskim izdvajanjima za poticaje privredi, najznačajnijim projektima i planovima Općine u narednom periodu.

ONASA: Kako ocjenjujete trenutnu ekonomsku situaciju na području općine Maglaj?

MUSTABAŠIĆ: Maglajska privreda se grčevito bori sa ekonomskom krizom i uspijeva u tome, tako da već bilježimo trend rasta zaposlenih. Mogu reći da je situacija trenutno prilično dobra.

ONASA: Ko su nosioci privrednog razvoja Općine i koje grane imaju najveće potencijale za ulaganje?

MUSTABAŠIĆ: Ovdje bih prvenstveno spomenuo Natron Hayat, kompaniju koja zapošljava oko 850 radnika. Posljednjih godina su počeli pozitivno poslovati, a period prije toga je obilježio investiranje, razvoj, osvajanje tržišta... Njihovo ulaganje je oko 90 miliona eura u pokretanje proizvodnje i sada su stabilan privredni sistem, uglavnom izvozno orjentisan. Njihov jedini problem je sirovina, odnosno crnogorično drvo, te neki neuređeni odnosi u smislu da električnu energiju daju po jako jeftinoj tarifi, a kada im zatreba, onda je kupuju po industrijskoj, skupljoj cijeni. Hatron Hayat je privatiziran po principu joint venture. Starom Natronu su ostavljene obaveze i novi vlasnik ga polako kupuje. Kao jedan lijep gest spomenuo bi to da je svim radnicima starog Natrona koji su trebali u penziju ponuđena naknada da idu u penziju, a da zaposle svoje dijete.

Također, imamo izvozno orjentisanu firmu Bontex koja proizvodi košulje. Osim za izvoz, oni rade i za domaće tržište. Uglavnom rade za poznatog kupca i oko godinu dana unaprijed imaju raspodate košulje i znaju kada trebaju kome poslati kontingent robe. Pretežno izvoze na tržište Švicarske. Uskoro se očekuje otvaranje još jednog pogona u kojem će posao dobiti oko 100 radnika.

Među nosiocima privrednog razvoja u Maglaju je i HM promet. Riječ je o firmi iz tekstilne industrije koja ima oko 260 radnika. Izvozi HTZ opremu za kompanije BMW, KIA, Maggi, zatim uniforme za ljekare i uposlenike u hotelima... Postoji mogućnost da, u saradnji sa njemačkim partnerom, naprave još jednu fabriku sa 300 do 350 radnika, ali o tome se još pregovara.

Imamo i Saraj-Milk mljekaru kapaciteta 11.000 litara mlijeka. Mi potičemo naše mljekare i mljekaru na način da dajemo poticaj od tri feninga po litru ako kupuje mlijeko od mljekara sa područja općine Maglaj. Naši poljoprivrednici na raspolaganju imaju 100.000 KM iz budžeta, a za mlijeko dobivaju poticaj od 10 feninga po litru. To se pokazalo kao veoma motivirajuće, jer se na taj način razvija poljoprivreda i otvaranju se velike farme u Maglaju.

Tu je i Primus koji ima oko 100 radnika i proizvodi građevinsku stolariju, zatim

Hajdić niskogradnja sa oko 20 radnika, Geoput sa oko 10 radnika, Feram Art Iron koji radi kovanu galanteriju za italijansko tržište, pekara i privredno društvo Non-stop koji snabdijevaju hljebom Konzumove centre, a imamo i dosta prevoznih firmi. Do kraja ove godine treba da se otvori i novi Motel "Bistrica", a vrijednost ulaganja procjenjuje se na dva miliona KM.

ONASA: Kakvi su trendovi, odnosno da li imate najave otvaranja još novih privrednih subjekata?

MUSTABAŠIĆ: Naglasio bih da u Maglaju postoji trend otvaranja novih preduzeća, posebno od naših ljudi iz inostranstva. Trenutno imamo 210 društava sa ograničenom odgovornošću i 370 radnji, iako smo mala općina.

U Maglaju se godišnje bilježi rast otvaranja novih preduzeća za oko tri do pet posto. Ovdje bih napomenuo da se uskoro očekuje da IKEA počne proizvodnju u Maglaju i posao će dobiti oko 30 radnika (proizvodnja stolica).

Također, u Maglaju imamo deset poslovnih zona, od kojih je jedna u našem, a ostale u privatnom vlasništvu.

ONASA: Šta Općina čini kako bi privukla inostrane ulagače?

MUSTABAŠIĆ: Kod nas procedura za registraciju nove firme traje sedam dana. U Općini smo formirali Odjeljenje za lokalni razvoj, a imamo i savjetnika za mala i srednja preduzeća. Oni su zaduženi da privrednika odvedu u resorno ministarstvo, banku ili neku drugu instituciju koja je važna za potencijalnog investitora, te da mu daju sve potrebne informacije kako bi se uvjerio da ima interes da otvori firmu u Maglaju. Istovremeno, u Vladi Zeničko-dobojskog kantona (ZDK) djeluje Biznis servis centar, odjeljenje koje je zaduženo da ubrzava određene procedure.

Također, na web stranici Općine Maglaj dostupne su sve informacije koje su potrebne privrednicima, afiši, brošure...

Moram napomenuti da u narednom periodu planirano napraviti tačnu evidenciju ljudi iz Maglaja koji sada žive u inostranstvu, kako bismo napravili dane dijaspore jer smatramo da tako možemo stvoriti prilike za nova ulaganja u Maglaj.

ONASA: Koliko Općina izdvaja za poticaj privredi i na koji način obezbjeđujete dodatna sredstva?

MUSTABAŠIĆ: Kada je riječ o poticajima, Općina iz budžeta izdvaja 100.000 KM za poljoprivredu. Naš budžet je relativno mali, oko šest miliona KM. Kao što sam već rekao, izdvajamo 10 feniga po litru mlijeka, zatim 20 KM po dulumu zemlje gdje je zasijan kukuruz, a 1 KM po m² plastenika/staklenika.

Na području općine imamo tri zemljoradničke zadruge i devet udruženja kojima apliciramo za kantonalna i federalna sredstva i pomažemo im da dođu do tih sredstava.

Ove godine smo organizovali obuku za mlade nezaposlene osobe sa Biroa rada. Bilo je 16 polaznika i pravili su projekte samozapošljavanja, nakon čega je nezavisna ekipa iz Regionalne ekonomske zajednice (REZ) ocijenila tri najbolja projekta koje smo nagradili sa po 5.000 KM da otvore privatnu radnju, a za 2012 godinu ćemo planirati 50.000 KM za 10 mladih poduzetnika.

Također, osiguravamo sredstva za sve projekte koje apliciramo prema EU, kantonalim i federalnim razvojnim agencijama, ambasadama... Imamo izuzetno dobru saradnju sa ambasadama Češke, Mađarske, Švicarske i dr.

Kako bismo podstakli stanovništvo da ne odlazi iz starog dijela grada, stare zanate i obrte smo oslobodili plaćanja taksi i poreza, kao i sve druge radnje u Starom gradu.

ONASA: Koje je najznačajnije projekte Općina realizirala u 2011. godini?

MUSTABAŠIĆ: Jedan od najznačajnijih projekata odnosi se na Poslovnu zonu Misurići, u koju je uloženo 370.000 KM i koja je već formirana u smislu urbanističkog reda, a trenutno radimo kanalizaciju i pokušavamo projektovati i sa Direkcijom cesta Federacije BiH (FBiH) uraditi uključno-isključnu petlju. U proteklom periodu, u saradnji sa Njemačkom organizacijom za razvojnu saradnju (GIZ) i REZ-om, uradili smo marketing-plan te poslovne zone.

Također, privodimo kraju tehničku dokumentaciju za sistem centralnog grijanja na biomasu, a istovremeno radimo glavni projekat za kotlovnici. U sklopu tog projekta potreban nam je teretni most na rijeci Bosni, koji bi trebao nositi cjevovod. Za taj most pripremili smo svu potrebnu dokumentaciju, kao i Glavni izvedbeni projekat vrijedan oko 200.000 KM, te smo ovaj most već kandidovali prema određenim ambasadama, a njegova vrijednost je oko 2.000.000 KM. Uporedo s tim aktivnostima, pregovaram s Natron Hayat-om da se njihov višak energije iskoristi za grijanje, jer oni imaju kotao na biomasu, sve dozvole i deponiju, odnosno sve preduslove da se uključe o projekat.

Tu je i projekat Lokalne akcione grupe (LAG) regije Doboj-Maglaj "DO-MA čisto", koji je počeo ove i trajaće do 2013. godine. Riječ je o projektu upravljanja otpadom u okviru kojeg su općine Maglaj i Doboj dobile po 400.000 eura i u njemu učestvuju sa po 10 posto. Na osnovu tog projekta Doboj dobija regionalnu deponiju koja će pokrivati 13 općina, a Maglaj Komunalno javno društvo oprema smećarama, kontejnerima, presama za papir...

Za nevladine organizacije (NVO) smo realizovali projekat UNDP LOD 1 vrijedan 194.000 KM, a u okviru projekta "Tour de lag", vrijednog 60.000 KM, urađena je rekonstrukcija i sanacija tvrđave u Maglaju. Takođe, od Kantonalnog i Federalnog ministarstva poljoprivrede, a uz učešće Općine Maglaj, dobili smo dvije vodenice na rijeci bistrici sa automatskom pakirnicom.

Očekivali smo i da počne realizacija projekta Međunarodnog fonda za poljoprivredni razvoj (IFAD), ali to se još nije desilo. Riječ je o projektu u koji je uključeno 15 općina iz FBiH, među kojima i Maglaj, a fond je 16 miliona USD. Čekamo da se formira državna vlada i ta sredstva će biti operativna.

ONASA: Šta Općina čini u oblasti pružanja pomoći za sanaciju klizišta?

MUSTABAŠIĆ: U ovoj godini smo dosta sredstava potrošili za klizišta. U Maglaju na oko 290 km² imamo više od 600 klizišta. Za idejno rješenje za sanaciju najvećeg klizišta, na kojem je popuno uništeno 28 objekata sa 35 porodica, prema mišljenju geologa potrebno je više od 100.000 KM, a pretpostavka je da bi sanacija koštala oko tri miliona KM. Zbog toga ćemo se, vjerovatno, zadržati na idejnom projektu, poravnati zemljište i pretvoriti ga u poljoprivredno. Jedno klizište u Šehićima smo upotpunosti sanirali, a vrijednost tog projekta je bila oko 200.000 KM. Predstoji nam projekat prema Donjim Bradićima od oko 100.000 KM, gdje postoji opasnost da to mjesto bude potpuno odsječeno od ostatka općine Maglaj.

Moram napomenuti da smo mi evidentirali ugrožena područja i uradili projekte ili predmjere radova, raspisali konkurs za odabir firme koja će utvrditi kojim objektima na tim područjima prijeti opasnost od klizišta, te da li ih je potrebno i kako zaštititi ili ćemo ih morati iseliti. Osnovne građevinske zahvate smo radili na gotovo svim klizištima. Uz pomoć Kantonalne i Federalne vlade, posebno Civilne zaštite FBiH, potpuno smo riješili sve porodice iz Suljakovića, uglavnom dodjelom finansijskih sredstava, a oni su ili kupovali ili gradili nove kuće - stanove, te tako riješili trajno svoj stambeni problem.

ONASA: U kojoj fazi je izrada "Strategije razvoja općine Maglaj 2012-2018. godina" i šta je njen konačan cilj?

MUSTABAŠIĆ: Ove godine nam ističe petogodišnja strategija razvoja koja je dosta dobro realizovana. Iako još radimo statusnu analizu, već sada mogu reći da je realizovano oko 80 posto te strategije. Preostalih 20 posto su bili određeni projekti koji su bili nerealni.

Novu, sedmogodišnju strategiju razvoja radimo po "miPRO metodologiji", odnosno po metodologiji integriranog planiranja, u čemu će nas pratiti OSCE, a pokušaćemo uključiti i GIZ. Mi smo inicirali pravljenje ove strategije po miPRO metodologiji, a nadamo se da će to uraditi i ostale općine kako bismo koristili istu terminologiju i pravili dokumente i projekte kojima će se moći aplicirati za sredstva iz fondova EU, ali i fondova u BiH, FBiH i kantonima.

Prema svjetskim standardima, formirali smo sektorske grupe za pripremu strategije koje pokrivaju: privredu, društveni razvoj i ekologiju. Svaka sektorska grupa će pozivati javnost da se uključi u izradu strategije, koja bi trebala biti gotova polovinom sljedeće godine.

ONASA: Na čemu će biti akcenat rada Općine u 2012. godini?

MUSTABAŠIĆ: Naredne godine ćemo pokušati pustiti u rad punim kapacitetom barem jednu poslovnu zonu. Pokušaćemo najvećoj poslovnoj zoni, Misurići, dati značaj jer je blizu grada, uz magistralni put, a radimo i na njoj infrastrukturi.

U proteklih sedam godina, koliko sam na mjestu načelnika Općine Maglaj, pravili smo oko 11 km asfaltnog puta godišnje. Napravili smo i jednu saobraćajnicu sa kružnim tokom koja vrijedi oko četiri miliona KM, tako da smo izmjestili "teški saobraćaj" iz centra grada.

Namjeravamo projektovati gradski most na rijeci Bosni prema Bijeloj Ploči, a onda ćemo pokušati osigurati sredstva za njegovu realizaciju.

Izgledno je i da ćemo dobiti oko 300.000 eura za projekat Delibegov han, kako bismo obnovili taj kulturno - historijski spomenik i na tom mjestu pružili kompletnu turističku uslugu. Taj projekat radimo zajedno sa REZ-om.

Interes nam je i da u narednom periodu omogućimo bolju putnu komunikaciju između Novog Šehera i Teslića, kao i Novog Šehera i Tešnja. Inače, u Novom Šeheru gravitira od 7.000 do 9.000 ljudi, i tu se desio najveći poslijeratni povratak. U saradnji sa kompanijom 'Širbegović' u toku je gradnja sportske dvorane vrijedne dva miliona KM, koja bi bila školska, a zadovoljavala bi i potrebe stanovnika novošeherskog kraja za kulturnim i sportskim događajima, što bi trebalo doprinijeti zbližavanju sva tri naroda tog kraja. Taj projekat bi trebao biti završen u 2012. godini, čemu se iskreno nadamo.

U toku je i projekat Turske međunarodne agencije za saradnju i razvoj (TIKA), vrijedan milion KM, za harem, te vanjsko i unutrašnje uređenje džamije Kuršumlije, a namjera nam je da taj projekat proširimo i na Trg Alije Izetbegovića, te ga upotpunosti obnovimo.

Mjesnim zajednicama pridajemo poseban značaj. Obećali smo poligon sportskih igara svakoj od 20 mjesnih zajednica. Taj projekat privodimo kraju i nadamo se da će biti završen u 2012. godini.

Nastavljamo izgradnju putnih komunikacija, vodovoda i kanalizacija po mjesnim zajednicama i u tome očekujemo pomoć svih nivoa vlasti u BiH, a dosta projekata kandidujemo prema EU, ambasadama, vladama, kao i fondovima EU.

NAJAVA RADIONICE O PROGRAMU ZAJEDNICE "EVROPA ZA GRAĐANE"



Ministarstvo pravde Bosne i Hercegovine i Direkcija za evropske integracije Vijeća ministara Bosne i Hercegovine, u saradnji sa projektom Podrška Vladi BiH u procesu evropskih integracija i koordinaciji pomoći Evropske zajednice – Faza III i projektom TACSO - kancelarija u BiH,

organizuju informativni dan i radionicu za potencijalne aplikante u Bosni i Hercegovini na temu mogućnosti korištenja programa Evropa za građane.

Cilj seminara je predstaviti program Evropa za građane i mogućnosti koje isti pruža za organizacije civilnog društva i jedinice lokalne samouprave, te prenijeti iskustva Republike Hrvatske u procesu pristupanja i korištenja Programa.

Seminar je namjenjen predstavnicima organizacija civilnog društva i lokalnih samouprava.

Informativni dan i radionica "Evropa za građane" će se održati:

- 29. novembra/studenog 2011. godine u Banjaluci, sa početkom u 10.00 sati, u hotelu Bosna, ulica Kralja Petra I Karađorđevića 97 - informativni dan
- 30. novembra/studenog 2011. godine u Sarajevu, sa početkom u 10.00 sati, u hotelu Hollywood, Dr. Pintola 23, Ilidža - radionica

Napomena: Pored navedenog informativnog dana i radionice, biće održani i dodatni informativni dani i radionice za program "Evropa za građane" u Mostaru i Brčkom te radionica u Banjoj Luci. Informacije o mjestu, vremenu i kriterijima za učešće na ovim dodatnim informativnim danima i radionicama biće predmet zasebnog otvorenog poziva.

Više informacija o seminaru, kriterijima za odabir učesnika i proceduri za prijavu učešća se nalazi u otvorenom pozivu, koji zajedno sa dnevnim redom i prijavom za učešće na informativnom danu i radionici možete preuzeti putem linka:

http://www.tacso.org/news/training-opp/Default.aspx?id=5843&template_id=73&langTag=bs-BA

DAN OTVORENIH DANA POVODOM OSVAJANJA BEACON STATUSA

BIHAĆ, 22. novembar/studeni – Nakon što je osvojila Beacon status o temi „Položaj i uloga mjesnih zajednica u jedinicama lokalne samouprave“, Općina Bihać upriličila je 22. novembra/studenog Dan otvorenih vrata, te ugostila brojne prijatelje iz BiH.

Beacon je prestižno priznanje koje dobijaju samo najbolji u razmjeni dobrih praksi.

Općini Bihać ovo je drugi put da je osvojila Beacon, a prethodilo je priznanje iz segmenta „Ljudski resursi“.

Nakon ugodnog druženja u kabinetu načelnika Albina Muslića, gđa. Jasmina Tatlić, Beacon koordinator, prezentirala je sistem i funkcionisanje rada u 35 mjesnih zajednica općine Bihać.

Načelnici koji su ovim povodom posjetili Bihać, još jednom su čestitali Bišćanima na odličnoj prezentaciji kao i ugodnom druženju, koje Bihać i njegovi građani znaju upriličiti.



NAJAVA obilježavanja Dana općina za mjesec decembar/prosinac

- **10. decembar/prosinac - Dan Općine Tešanj.** To je dan sjećanja na vakufnamu Gazi Ferhad-bega kojom je 1559. godine utemeljen Tešanj.

